

唐诗别裁集

下



〔清〕沈德潜 选注

唐诗别裁集

〔清〕沈德潜 选注

下



重订唐诗别裁集卷十一

刘长卿

中唐诗近收敛，选言取胜，元气不完，体格卑而声调亦降矣。刘文房工于铸意，巧不伤雅，犹有前辈体段。

穆陵关北逢人归渔阳

逢君穆陵路，匹马向桑乾。
楚国苍山古，幽州白日寒。
沉郁。城池百战后，耆旧几家残？
处蓬蒿遍，归人掩泪看。

逢郴州使因寄郑协律（二）

相思楚天外，梦寐楚猿吟。
更落淮南叶，难为江上心。
衡阳问人远，湘水向君深。
欲逐孤帆去，茫茫何处寻？

岳阳馆中望洞庭湖

万古巴丘戍，平湖此望长（二）。
问人何淼淼，愁暮更苍苍。
叠浪浮元气，中流没太阳。
孤舟

有归客，早晚达潇湘？五六犹有气焰，然视襄阳、少陵二篇，如江、黄之敌荆楚矣。

北归次秋浦界清溪馆

万岭猿啼断，孤村客暂依。雁过彭蠡暮，人向宛陵稀。旧路青山在，余生白首归。渐知行近北，不见鹧鸪飞。

余干旅舍

摇落暮天迥，青枫霜叶稀。孤城向水闭，独鸟背人飞。渡口月初上，邻家渔未归。乡心正欲绝，何处捣寒衣？

经漂母墓

昔贤怀一饭，兹事已千秋。古墓樵人识，前朝楚水流。渚蘋行客荐，山木杜鹃愁。春草茫茫绿，王孙旧此游。
方虚谷云：「意深不露。盖谓楚、汉兴亡，唯有流水耳。一老母之墓，樵人犹能识之，以其有一饭之德于时也。」

送李中丞归汉阳别业

流落征南将，曾驱十万师。罢归无旧业，老去恋明时。
独立三边静，轻生一剑知。此追叙其向日之功。茫茫江汉上，日暮欲何之！

移使鄂州，次岷阳馆，怀旧居

多惭恩未报，敢问路何长？万里通秋雁，千峰共夕阳。
旧游成远道，岷阳馆。此去更违乡。
怀旧居。草露深山里，朝朝满客裳。

酬皇甫侍御见寄，时前相国姑臧公初临郡

离别江南北，汀洲叶再黄。路遥云共水，沙迥月如霜。
岁俭依仁政，年衰忆故乡。伫看宣室召，汉法倚张纲。
此指初临郡，答侍御。

送齐郎中典括州

即今之处州。

星象移何处？旌麾独向东。劝耕沧海畔，听讼白云中。
树色双溪合，猿声万岭同。石门康

乐住，几里枉帆通。

送王端公入秦赴上都

旧国无家访，临歧亦羨归。途经百战后，客过二陵稀。秋草通征骑，寒城背落晖。行当蒙顾问，吴楚岁频饥。望其救时，不是寻常酬应。

送张继司直适越

时危身适越，事往任浮沉。万里三江去，孤舟百战心。（三）春风吴渚绿，古木剡溪深。明日沧洲路，归云不可寻。

宿北山禅寺

上方鸣夕磬，林下一僧还。密行传人少，禅心对虎闲。青松临古路，白月满寒山。旧识窗前桂，经霜更待攀。

寻南溪常道士

一路经行处，莓苔见屐痕。白云依静渚，芳草闭闲门。过雨看松色，随山到水源。溪花与禅意，相对亦忘言。结意言其道士能通禅理也。

碧涧别墅喜皇甫侍御相访

荒村带晚照，落叶乱纷纷。古路无行客，空山独见君。野桥经雨断，涧水向田分。不为怜同病，何人到白云？

海盐官舍早春

小邑沧洲吏，新年白首翁。一官如远客，万事极飘蓬。柳色孤城里，莺声细雨中。羁心早已乱，何事更春风？

钱别王十一南游

望君烟水阔（四），挥手泪沾巾。飞鸟没何处？青山空向人。长江一帆远，落日五湖春。谁见汀洲上，相思愁白蘋？

新年作

乡心新岁切，天畔独潸然。老至居人下，春归在客先。
巧句。别于盛唐，正在此种。岭猿同旦暮，
江柳共风烟。已似长沙傅，从今又几年？

松江独宿

洞庭初下叶，孤客不胜愁。明月天涯夜，青山江上秋。
一官成白首，万里寄沧洲。久被浮
名系，能无愧海鸥？

送侯侍御赴黔中充判官

不识黔中路，今看遣使臣。猿啼万里客，鸟似五湖人。
地远官无法，山深俗岂淳？须令荒
徼外，亦解惧埋轮。
从黔中著意。

钱起

和万年成少府寓直

赤县新秋夜，文人藻思催。钟声自仙掖，月色近霜台。一叶兼萤度，孤云带雁来。明朝紫书下，应问长卿才。钱、刘以下，专工造句。

裴迪南门秋夜对月

夜来诗酒兴，月满谢公楼。影闭重门静，寒生独树秋。鹊惊随叶散，萤远入烟流。今夕遥天末，清光几处愁？月夜萤光自失，然远入烟丛，则仍见其流矣。此最工于体物。

送屈突司马充安西书记

制胜三军劲，澄清万里余。星飞庞统骥，箭发鲁连书。海月低云旆，江霞入锦车。遥知太阿剑，计日斩鲸鱼。

送少微师西行

随缘忽西去，何日返东林？世路无期别，空门不住心。人烟一饭少，山雪独行深。天外猿啼处，谁闻清梵音？

送僧归日本

上国随缘住，来途若梦行。浮天沧海远，去世法舟轻。水月通禅寂，鱼龙听梵声。惟怜一灯影，万里眼中明。

题温处士山居

谁知白云里，别有绿萝春？苔绕溪边径，花深洞里人。逸妻看种药，稚子伴垂纶。颖上逃
尧者，何如此养真！许由之逃，虚言其高，不如日用常行中自存逸趣也。

送夏侯审校书东归

楚乡飞鸟外，独与片帆还。破镜催归客，残阳见旧山。诗成流水上，梦尽落花间。倘寄相
思字，愁人定解颜。

送征雁

秋空万里静，嘹唳独南征。风急翻霜冷，云开见月惊。塞长凭去翼，影灭有余声。怅望遥
天外，乡愁满目生。六语传雁去后之神。

韦应物

奉送从兄宰晋陵

东郊春草歇，千里夏云生。立马愁将夕，看山独送行。
依微吴苑树，迢递晋陵城。慰此断行别，邑人多颂声。

送汾城王主簿

少年初带印，汾上又经过。芳草归时遍，情人故郡多。
禁钟春雨细，宫树野烟和。相望东桥别，微风起夕波。
意主簿必向住汾城，故有三四语。雨中听钟，其声自细，粗心人未必知之。

送别覃孝廉

思亲当自去，不第未蹉跎。家住青山下，门前芳草多。
秭归通远徼，巫峡注惊波。州举年年事，还湖复几何？
说得心平气和，送不第人，自应如是。

送元仓曹归广陵

官闲得去住，告别恋音徽。旧国应无业，他乡到是归。苦句。楚山明月满，淮甸夜钟微。何处孤舟别？遥遥心曲违。

赋得暮雨送李胄（五）

楚江微雨里，建业暮钟时。漠漠帆来重，冥冥鸟去迟。海门深不见，浦树远含滋。相送情无限，沾襟比散丝。关合。

淮上喜会梁州故人

江汉曾为客，相逢每醉还。浮云一别后，流水十年间。欢笑情如旧，萧疏鬓已斑。何因不归去？淮上有秋山。语意好，然淮上实无山也。

郎士元 钱、郎送人之作，时得之者以为宠荣。

送李将军赴邓州（六）应是定州，即古之中山，近今之真定。若南阳邓州，与诗中意不合。

双旌汉飞将，万里独横戈。春色临关尽，黄云出塞多。极警拔语，右丞则以「黄云断春色」五字尽之。鼓鼙悲绝漠，烽戍隔长河。莫断阴山路（七），天骄已请和。

送杨中丞和蕃

锦车登陇日，边草正萋萋。旧好随君长，新愁听鼓鼙。河源飞鸟外，雪岭大荒西。汉垒今犹在，遥知路不迷。

送钱大

暮蝉不可听，落叶岂堪闻？共是悲秋客，那知此路分？荒城背流水，远雁入寒云。陶令东篱菊，余花可赠君。高仲武谓工于发端，然「不可听」「岂堪闻」，未免于复。愚谓结意望其能秉高节，更耐寻绎也。

送贾奚归吴

东南富春渚，曾是谢公游。今日奚生去，新安江正秋。水容清过客，枫叶落行舟。遥想赤亭下，闻猿应夜愁。

送彭偃、房由赴朝，因寄钱大郎中、李十七舍人

衰病已经年，西峰望楚天。风光欺鬓发，秋色换山川。寂寞浮云外，支离汉水边。平生故

人远，君去话潸然。

春日宴张舍人宅

懒寻芳草径，来接侍臣筵。山色知残雨，墙阴觉暮天。莺归汉宫柳，花隐杜陵烟。地与东邻接，春光醉目前。

皇甫冉

字茂政，丹阳人。

十岁能诗文。

天宝中成进士第一，官无锡尉，左金吾兵曹。

大历中，迁右补阙。

巫山高

巫峡见巴东，迢迢出半空。云藏神女馆，雨到楚王宫。朝暮泉声落，寒暄树色同。清猿不可听，偏在九秋中。终篇稳称，可继沈云卿作。

送韩司直

游吴还适越，来往任风波。复送王孙去，其如芳草何？岸明残雪在，潮满夕阳多。季子留遗庙，停舟试一过。

送康判官往新安

不向新安去，那知江路长。猿声近庐霍，水色胜潇湘。驿路收残雨，渔家带夕阳。何须愁旅泊，使_者有_辉光。开后人套语。

奉和王相公早春登徐州城

落日凭危堞，春风似故乡。川流通楚塞，山色绕徐方。壁垒依寒草，旌旗动夕阳。元戎资上策，南亩起耕桑。

途中送权三兄弟

淮海风涛起，江关幽思长。同悲鹊绕树，独作雁随阳。喻漂泊无依。山晚云和雪，汀寒月映霜。由来濯缨处，渔父爱沧浪。

归渡洛水

暝色赴春愁，写渡水晚景，自然入妙，与「落日在帘钩」一种起法。归人南渡头。渚烟空翠合，滩月碎光流。澧浦饶芳草，沧浪有钓舟。谁知放歌处，此意正悠悠！

逢庄纳因赠

世故还相见，天涯共向东。春归江海上，人老别离中。郡吏名何晚，沙鸥道自同。甘泉须早献，且莫叹飘蓬。

皇甫曾

字孝常，冉之弟也。天宝中，第进士，历侍御史。坐事贬舒州司马、阳翟令。诗与兄齐名。

送人往荆州

亦作李端诗。

草色随骢马，悠悠同出秦。水传云梦晓，山接洞庭春。帆影连三峡，猿声近四邻。青门一分手，难见杜陵人。

送李中丞归本道

上将宜分阃，双旌复出秦。关河三晋路，宾从五原人。孤戍云通海，平沙雪度春。酬恩看玉剑，何处有烟尘？

送孔征士

谷口多幽处，君归不可寻。家贫青史在，身老白云深。扫雪开松径，疏泉过竹林。余生负丘壑，相送亦何心？

司空曙

字文明，广平人。登进士第。贞元中，为水部郎中，终虞部。

云阳馆与韩绅宿别〔九〕

故人江海别，几度隔山川。乍见翻疑梦，相悲各问年。孤灯寒照雨，深竹暗浮烟。更有明朝恨，离杯惜共传。
三四写别久忽遇之情，五六夜中共宿之景，通体一气，无短钉习，尔时已为高格矣。

贼平后送人北归

世乱同南去，时清独北还。他乡生白发，旧国见青山。晓月过残垒，繁星宿故关。寒禽与衰草，处处伴愁颜。
四语与「残阳见旧山」同妙。

送郑明府贬岭南

青枫江色晚，楚客独伤春。共对一尊酒，相看万里人。猜嫌成谪宦，正直不妨身。
五字可谓赠人以言。莫畏炎方久，年年雨露新。

经废宝庆寺